

БАНК АЖБОРОТНОМАНИ

Банк ходимлари ва тадбиркорларнинг ҳафталик газетаси ISSN 2010-6602 Сантимига утиш учун QR-коднинг телефонингиз орқали сканер қилинг.



1995 йил январдан бошлаб нашр этилмоқда №4 (1183), 2019 йил 24 январь

МАРКАЗИЙ БАНК ХАБАРЛАРИ

Олий Мажлис Сенати 100 000 (юз минг) сўмлик банкнот намунаси ва дизайнини маъқуллади.

Ўзбекистон Республикаси Олий Мажлис Сенати Кенгашининг 2019 йил 15 январдаги қарори билан 100 000 (юз минг) сўмлик банкнотнинг намунаси ва дизайни маъқулланди.

Аҳолига нақд пул орқали ҳисоб-китобларни амалга оширишда янада қулайликлар яратиш ва банкнот қаторини оптималлаштириш мақсадида йирик номиналдаги банкнот муомаллага чиқарилмоқда.

Янги банкнотнинг муомаллага чиқарилиши:

- нақд пуллар билан ҳисоб-китобларни амалга оширишда қулайликлар яратиш;
- нақд пулларни сақлаш ва ташиш билан боғлиқ харажатларни камайтириш;
- аҳолига банкоматлар орқали хизмат кўрсатишда самарадорлиқни оширишга имкон беради.

100 000 (юз минг) сўм қийматдаги банкнотлар амалдаги мавжуд пул массаси доирасида чиқарилади ҳамда унинг ўсишига таъсир кўрсатмаган ҳолда муомаладаги нақд пуллар таркибини оптималлаштиришга хизмат қилади.

Янги номиналдаги банкнотнинг кўриниши, тавсифи ва чиқарилиш санаси Марказий банк томонидан оммавий ахборот воситаларида эълон қилинади.

8 МИЛЛИАРД ЕВРОДАН ЗИЁД ҚИЙМАТДАГИ ЛОЙИХАЛАР БЎЙИЧА КЕЛИШУВЛАРГА ЭРИШИЛДИ



Ўзбекистон Республикаси Президенти Шавкат Мирзиёев ва Германия Федерал канцлери Ангела Меркелнинг музокаралари олдидан оммавий ахборот воситалари вакиллари учун брифинг ўтказилди.



Ангела Меркел Ўзбекистон Президентининг ташрифи узоқ танаффусдан кейинги муҳим ташриф экани, икки томонлама ҳамкорлик ривожига катта туртки беришини таъкидлади.

– Биз Ўзбекистоннинг ишончли шериги бўлишни хоҳлаймиз. Мамлакатларимиз ўртасидаги алоқаларни кенгайтириш учун кўплаб имкониятлар борлигини кўрмоқдамиз, – деди Германия канцлери.

Шавкат Мирзиёев Ўзбекистон делегациясига кўрсатилаётган юксак ҳурмат учун чуқур миннатдорлик билдириб, германияликларни жорий йил май ойида нишонланадиган Германия Федератив Республикаси ташкил этилганининг 70 йиллиги билан табриклади.

Томонлар сўнгги йилларда икки томонлама алоқалар жадал ривожланиб, янги мазмун билан бойиб бораётгани, сиёсий мулоқотлар фаоллашаётганини мамнуният билан қайд этди.

Президентимиз Ўзбекистон Германия билан алоқаларни сифат жиҳатидан янги, янада юқори босқичга олиб чиқишга интилишини алоҳида таъкидлади.


Музокараларда сиёсат, хавфсизлик, савдо, технология, инновация, инвестиция ва маданий-гуманитар соҳалардаги ҳамкорликнинг ҳолати ва истиқболлари муҳокама этилиши маълум қилинди.

Томонлар Бирлашган Миллатлар Ташкилоти, Европада хавфсизлик ва ҳамкорлик ташкилоти ва бошқа халқаро тузилмалар доирасида янада яқиндан ҳамкорлик қилишдан манфаатдор экани қайд этилди.

Европа Иттифоқининг Марказий Осиё бўйича янги стратегияси асосида икки томонлама муносабатлар мустаҳкамланиши таъкидланди.

(Давоми 2-бетда.)

2019 ЙИЛГИ ДАВЛАТ ДАСТУРИ ТАСДИҚЛАНДИ



Президентимизнинг "2017–2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини "Фаол инвестициялар ва ижтимоий ривожланиш йили"да амалга оширишга оид Давлат дастури тўғрисида"ги Фармони билан 2019 йилда мамлакатни ривожлантиришнинг устувор вазибалари белгилаб олинди.

Унга кўра, жорий йилда умумий қиймати 16,9 трлн. сўм ва 8,1 млрд. АҚШ долларига тенг лойиҳаларни амалга ошириш режалаштирилмоқда.

Шунингдек, дастурда жорий йилги асосий йўналишлар – давлат ва жамият қурилиши тизимини такомиллаштириш, қонун устуворлигини таъминлаш ва суд-ҳуқуқ тизимини янада ислоҳ қилиш, иқтисодий ривожлантириш ва инвестицияларни фаол жалб этиш, ижтимоий ривожланиш, хавфсизлик, миллатлараро тотувлик ва диний бағрикенгликни таъминлаш ҳамда ташқи сиёсат соҳалари ўрин олган.

Мазкур Фармон билан иқтисодий ривожлантириш соҳасида асосий эътибор макроиқтисодий барқарорликни таъминлаш, соғлом рақобат учун зарур шароитларни яратиш, ишбилармонлик ва инвестиция муҳитини тубдан яхшилаш,

иқтисодиётда давлат иштирокини жиддий равишда камайтириш, юқори иқтисодий ўсиш суръатларини сақлаб қолиш, "хуфёна иқтисодиёт"га қарши курашиш ва унинг улушини кескин қисқартириш, валюта сиёсатини эркинлаштиришни давом эттиришга қаратилиши белгилаб олинди.

Қолаверса, давлат дастурида назарда тутилган тадбирлар, айниқса, хорижий инвестицияларни жалб этиш, қулай инвестиция муҳитини яратиш, шунингдек, мамлакатимиз ҳудудларининг ижтимоий ривожланиш даражасини ошириш соҳасидаги тадбирларнинг самарали ва ўз вақтида ижро этилишини таъминлаш юзасидан чоралар қўриладиган бўлди ҳамда Ўзбекистон Республикасининг тўғридан-тўғри инвестициялар жамғармасини ташкил этиш белгиланди.

(Давоми 2-бетда.)

2019 йил 16 январь кун Марказий банк томонидан депозит аукционни ўтказилди. Аукцион натижаларига кўра, 3 та тижорат банкининг 130 млрд. сўм маблағлари ўртача 9,87% ставкаси билан 2 ҳафталик депозитга жойлаштирилди.

2018 йилда банк қарталаридан ечилган пуллар ҳажми 2017 йилга нисбатан 4 баробарга ошиб, 12,29 трлн. сўмни ташкил этди.

2018 йил декабрь ойида миллий валютадаги жами кредитлар (имтиёзли кредитлар бўйича фоиз ставкаларини ҳисобга олмаган ҳолда) бўйича ўртача тортилган фоиз ставкаси 2017 йилнинг декабрь ойига нисбатан 3,3%га ошиб, 21,8%ни ташкил этди. Шунингдек, қисқа муддатли кредитлар бўйича ўртача тортилган фоиз ставкаси 2017 йил декабрь ойидаги 17,6%дан 2018 йил декабрь ойига келиб 22,4%гача ҳамда узоқ муддатли кредитлар бўйича 18,7%дан 21,5%гача ошиши кузатилди.

Валюталар курслари 22.01.19 дан

USD доллар	EUR евро	GBP фунт	JPY йен
\$ 8378,18 сўм	€ 9518,45 сўм	£ 19785,23 сўм	¥ 126,33 сўм
↑ +22,00	↓ -63,59	↑ +55,06	↑ +1,36

ЖАРАЁН

2017–2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясига мувофиқ мамлакатимизда давлатнинг иқтисодийдаги иштирокини камайтириш, тадбиркорлик субъектларининг ҳуқуқларини ҳимоя қилиш, хусусий мулкнинг устуворлигини янада кучайтириш, бизнес ташаббуслар, стартапларни ҳар томонлама қўллаб-қувватлашга оид кенг қамровли ислохотлар амалга оширилмоқда. Бу борада банк тизимида ҳам комплекс чора-тадбирлар режаси ишлаб чиқилган бўлиб, уларнинг ижроси босқичма-босқич таъминланмоқда.

Кайд этиш жоизки, тижорат банклари томонидан тадбиркорликни ривожлантириш мақсадида ажратилаётган кредит маблағлари ҳудудларнинг ижтимоий-иқтисодий ўсишида муҳим роль ўйнамоқда. Бу ўз навбатида, юртимизда ишбилармонлик муҳитининг яхшиланишига, тадбиркорлар сонининг ортишига, ишлаб чиқариш ва хизмат кўрсатиш тармоқларининг ўсишига, энг асосийси, юртимиз равнақига хизмат қилиб, минглаб ҳамюртларимизнинг иш билан таъминланишига ҳам асос бўлаётди.

Жумладан, 2018 йилнинг 1 декабрь ҳолатига кўра тижорат банклари томонидан 192 мингдан ортиқ кичик бизнес ва хусусий тадбиркорлик субъектларига барча молиялаш манбалари ҳисобидан жами 29,9 трлн. сўм кредит ажратилган. Мазкур маблағлар асосида тадбиркорлик субъектлари фаолиятини ташкил этиш, кенгайтириш, хизмат кўрсатиш ва ишлаб чиқаришни модернизация қилиш, оилавий тадбиркорлик ва кичик ҳажмда ишлаб чиқарувчи субъектларни қўллаб-қувватлаш каби бир қатор йўналишлар молиялаштирилган.



Шуни ҳам қўшимча қилиш керакки, бугунги кунда аҳоли турмуш фаровонлигини ошириш ва бандлигини таъминлаш учун қатор йўналишларда имтиёзли кредитлар берилмоқда. Натижада тадбиркорлик-

нинг бошидан тутаётган ҳамюртларимиз сони тобора ошиб бормоқда.

Ана шундай имтиёзли кредитлардан бири "Ижтимоий ҳимоя" дастурлари доирасида ажратилаётган маблағлар бўлиб, ўтган йили республикамиз бўйича жами 62 389 нафар муайян меҳнат турлари билан шуғулланиш истагида бўлган фуқаролар, жумладан, кам таъминланган оилаларга 645,3 млрд. сўмдан ортиқ микрокредитлар тақдим этилди ва уларнинг ҳаётида ўз ўринларини топишларига кўмаклашилди.

Президентимизнинг 2018 йил 7 июндаги "Ҳар бир оила – тадбиркор" дастурини амалга ошириш тўғрисида"ги ПҚ-3777-сон қарори ижроси доирасида 47 мингдан ортиқ фуқаро ва тадбиркорлик субъектларига қарийб бир трлн. сўмдан ортиқ имтиёзли кредитларнинг ажратилгани иқтисодий ривож учун қўйилган муҳим қадамлардан бири бўлди. Оилавий тадбиркорлар сафи ортиб, кўплаг ҳамюртларимиз рўзғорига кўт-баракани инди. Мазкур кредитнинг йиллик 7 фоиз ставкада, 6 ойгача имтиёзли давр билан 3 йилдан кўп бўлмаган муддатга, кредит ҳисобига амалга оширилаётган лойиҳанинг бизнес-режасига мувофиқ, ўзини ўзи қоплаш жиҳатларидан келиб чиқиб 2 йилгача имтиёзли давр билан 5 йил муддатгача ажратилаётгани фуқароларимиз учун янада қулайлик яратди.

Имтиёзли кредитлардан яна бири қишлоқ ҳўжалиги соҳасида жавлон уриб меҳнат қилаётган фермеру деҳқонларимизга асқотмоқда. Давлатимиз раҳбарининг 2018 йил 26 апрелдаги "Фермер, деҳқон

ИМТИЁЗЛИ КРЕДИТЛАР – ФАОЛ ИШЛАБ ЧИҚАРИШ ПОЙДЕВОРИ

ҳўжаликлари ва томорқа ер эгалари фаолиятини такомиллаштириш бўйича қўшимча чора-тадбирлар тўғрисида"ги ПҚ-3680-сон қарори ижроси доирасида тижорат банклари томонидан қарийб 7 минг нафар фермер, деҳқон ҳўжаликлари ва томорқа ер эгаларига ўз фаолиятларини йўлга қўйиш ва кенгайтиришлари учун 109,4 млрд. сўм миқдорида молиявий кўмак берилди.

Мазкур кредитлар Фермер, деҳқон ҳўжаликлари ва томорқа ер эгаларини қўллаб-қувватлаш жамғармаси маблағлари ҳисобидан "Томорқа хизмати" МЧЖ, қишлоқ ҳўжалиги соҳасидаги ишлаб чиқариш, қайта ишлаш, тайёрлаш, таъминлаш, савдо ташкилотлари ҳамда лизинг компанияларига моддий-техника базасини мустаҳкамлаш, қишлоқ ҳўжалиги техникалари ва транспортларини сотиб олиш, фермер, деҳқон ҳўжаликлари ва томорқа ер эгаларининг иссиқхоналарини қуриш учун



ва бутловчи қисмлар харид қилишга йиллик 7 фоиз ставкада "Микрокредитбанк", "Агробанк", ҳамда "Халқ банки" томонидан 1 йил имтиёзли давр билан 3 йил муддатга ажратиб келинмоқда.

Президентимизнинг 2017 йил 17 ноябрдаги "Хўнарамандчиликни янада ривожлантириш ва хўнарамандларни ҳар томонлама қўллаб-қувватлаш чора-тадбирлари тўғрисида"ги ПФ-5242-сон Фармони ижроси доирасида ўтган йили 6 695 та хўнарамандчилик фаолияти билан шуғулланувчи фуқароларни қўллаб-қувватлаш, ёшлар, аёллар ва кам таъминланган ои-



лалар бандлигини таъминлаш мақсадида ажратилган 210 млрд. сўмдан ортиқ имтиёзли кредит маблағлари эса ҳудудларимизда хўнарамандчилик тармоғининг янада ривожига туртки бўлди.

Имтиёзли кредитлар ҳақида гап кетганда, "Yoshlar – kelajagimiz" Давлат дастури бўйича амалга оширилаётган ишларга алоҳида тўхталиш жоиз. Чунки мазкур дастур асосида бугун кўпга ёшлар ўз бизнесини йўлга қўйиб, ҳам оиласи иқтисоди, ҳам юрт ривожига учун фойда олиб келмоқда. Бу борада уларга "Миллий банк", "Ипак йўли банки", "Халқ банки" ҳамда "Ҳамкорбанк" томонидан йўлга қўйилган ёшларнинг бизнес ташаббуслари, стартаплари, ғоялари ва лойиҳаларини амалга ошириш учун имтиёзли кредит ва мол-мулкни лизингга бериш амалиёти ҳар томонлама кўмак бераётди.

Манзилли рўйхатга асосан "Yoshlar – kelajagimiz" жамғармаси маблағлари ҳисобидан ўтган йилда 2 902 та лойиҳага 5 йил муддатга 12 ойгача имтиёзли давр билан жами 360,1 млрд. сўм миқдорида имтиёзли кредитлар ажратилди. Жумладан, мазкур дастур доирасида Наманган вилояти Чортоқ туманидаги "Темур спорт клуби" МЧЖ қошида тикув, трикотаж цехлари, ўқув маркази, аҳолига хизмат кўрсатиш ҳамда савдо шохобчалари фаолияти йўлга қўйилиб, натижа-

да 60 нафар киши доимий иш билан таъминланди.

Шу билан бирга, республикамиз тижорат банклари томонидан аҳолида тадбиркорлик кўникмаларини шакллантириш ва тегишли фаолият турини ташкил қилишга амалий ёрдам кўрсатиш мақсадида ташкилот ва идоралар билан ҳамкорликда тадбиркорлик соҳасида яратилган имтиёзлар, банк хизматлари турлари ва шартларини тушунтириш юзасидан доимий равишда амалий семинар ва учрашувлар ўтказиб келинмоқда.

Бу борадаги ишлар жорий – "Фаол инвестициялар ва ижтимоий ривожланиш йили"да ҳам бардавом бўлиб, асосий эътибор тадбиркорлик субъектларини ҳар томонлама қўллаб-қувватлашга қаратилади. Бу жараёнда бизнес лойиҳаларини амалга ошириш учун йўналтирилган кредит ресурсларининг фойдаланишини кенгайтириш мақсадида банк кредитлари бўйича мақсадли жамғармаларнинг кафилилик ҳамда кредит бўйича фоиз қораларини қоплаш учун компенсация бериш амалиётларини кенг жорий этиш кўзда тутилмоқда.

Мухтор ШОНАЗАРОВ,
Марказий банк
Тадбиркорлик
субъектларини молиявий
қўллаб-қувватлаш бўйича
тижорат банклари
фаолиятини мониторинг
қилиш департаменти
директори ўринбосари,
бошқарма бошлиғи

ИНВЕСТИЦИЯ МАЖБУРИЯТЛАРИ БАЖАРИЛЯПТИМИ?

2018 йил давомида давлат активлари сотилиши бўйича рўйхатга олинган 1 540 та олди-сотди шартномаси бўйича 603,3 млн. АҚШ доллари ва 3 578,3 млрд. сўм миқдорида инвестиция киритилиши назоратга олинган. Шулардан 23 та олди-сотди шартномаси хорижий инвесторлар билан тузилган бўлиб, юқоридаги шартномаларга кўра, бажарилган инвестициялар умумий миқдори 176,9 млн. АҚШ доллари ва 1 958,2 млрд. сўмни ташкил этди. Инвестиция киритиш даврида 19 268 дан ортиқ янги иш ўринлари яратилди.

2018 йил давомида 120 та шартнома бекор қилинди, 328 та шартнома бўйича инвестиция мажбуриятлари тўлиқ бажарилди ва қабул қилинди.

2019 йилнинг 1 январь ҳолатига кўра давлат активлари сотилиши бўйича рўйхатга олинган 1 212 та олди-сотди шартномалари бўйича 593,3

млн. АҚШ доллари ва 3 052,7 млрд. сўм миқдорида инвестиция киритилиши назоратга олинган. Шулардан 18 та олди-сотди шартномаси хорижий инвесторлар билан тузилган. Юқоридаги шартномаларга кўра, бажарилган инвес-



тициялар умумий миқдори 166,9 млн. АҚШ доллари ва 1 432,6 млрд. сўмни ташкил этди. Инвестиция киритиш даврида 6 353 дан ортиқ янги иш ўринлари яратилди.

Ҳисобот даврида 328 та олди-сотди шартномасига асосан киритилган умумий 10,1 млн. АҚШ доллари ва 525,6 млрд. сўм миқдоридаги инвестициялар комиссия томонидан қабул қилинган ҳамда инвестиция ҳисобидан янги 12 915 та иш ўринлари яратилган.

Шу билан бирга, йил бошидан 174,2 млн. АҚШ доллари ва 1 309,7 млрд. сўм миқдорида инвестиция киритиш шarti билан 651 та олди-сотди шартномаси расмийлаштирилган.

БАНК ЯНГИЛИКЛАРИ

2018 ЙИЛДА “ЎЗСАНОАТҚУРИЛИШБАНК” КАНДАЙ НАТИЖАЛАРГА ЭРИШДИ?

Феолияти қарийб бир асрга тенглашадиган “Ўзсаноатқурилишбанк” 2018 йилда ҳам юқори натижаларга эришиб, ўз мавқени сақлаб қолди. Хусусан, ўтган йилда актив кўрсаткичлари ҳамда кредитларидан олган фойдаси аввалги даврларга нисбатан бир неча баробар ортди.

Бу ҳақда Банкинг 2018 йилги феолияти якунларига бағишлаб ўтказилган банк Бошқаруви йиғилишида маълум қилинди.

Дарҳақиқат, 2018 йил “Ўзсаноатқурилишбанк” учун сермахсус кечди. Банк мижозларга хизмат кўрсатиш сифатини ошириш, чакана банк хизматлари, шу жумладан, интерактив хизматларни ривожлантириш бўйича эътиборга молик ишларни амалга оширди.

Жумладан, республикамизда биринчилардан бўлиб мижозлараро операцияларнинг 24/7 режими

ишга туширилиб, тушлик вақтида танаффуссиз хизмат кўрсатиш тизими йўлга қўйилди. Онлайн омонатлар, онлайн микроқарз, “Кредит-карта”лар жорий қилинди. Миллий валютадаги виза карталарини ис-талган мамлакатда ишлатиш имконияти яратилди.

Йиғилишда Банк томонидан 2018 йилда эришилган асосий кўрсаткичлар сарҳисоб қилинди. Маълум қилинишича, ҳисобот даврида банк активлари, кредит портфели, мажбуриятлари ҳажми бўйича республика тижорат банклари орасида 2-ўринни, капитали, даромадлари миқдори бўйича эса 3-ўринни эгаллаган. Хусусан, кредит портфелида юқори даромад келтирувчи чакана кредитлар 26 баробарга, кичик бизнесга ажратилган кредитлар 3 баробарга ортган.

Йиғилишда, шунингдек, Банкинг ҳар бир филиали феолиятига доир 2018 йилги ҳисобот ҳамда 2019 йилда амалга оширилиши мўлжалланган бизнес-режаси тақдироти ўтказилди.

Банк Бошқаруви йиғилишида 2019 йилда амалга оширилиши зарур бўлган асосий вазифалар ҳам белгилаб олинди.

“ТАРАҚҚИЁТ” ЯНГИ МИНИ-БАНКИ ИШ БОШЛАДИ

Пойтахтимизнинг Чилонзор туманидаги “Қатортол” савдо мажмуасида “Микрокредитбанк” акциядорлик тижорат банки Амалиёт бошқармасига қарашли “Тараққиёт” номли янги мини-банк иш бошлады.



Мазкур мини-банкнинг очилиш маросимида турли давлат ва жамоат ташкилотлари ходимлари, банк мижозлари бўлган етакчи тадбиркорлар ва аҳоли вакиллари иштирок этди. Малакали мутахассислар томонидан мижозларга барча турдаги банк хизматлари кўрсатадиган мазкур мини-банк замонавий жиҳозлар, шинам ва ёруғ хоналар ҳамда узлуксиз хизмат кўрсатувчи банкоматлар билан таъминланган.

Мини-банкда мижозлар ортиқча оворагарчиликларсиз ҳисоб рақам очиш, омонат қўйиш, кредит олиш, барча турдаги тўловларни амалга ошириш, банкомат орқали миллий ва халқаро пластик карталардаги маблағларни нақдлаштириш, халқаро валютани сўмга айир-бошлаш, пул ўтказмаларини амалга ошириш имкониятларига эга.

Мини-банкнинг тантанали очилиш маросимида банк Бошқаруви раиси ўринбосари Азиз Низомов сўзга чиқиб, мамлакатимиз иқтисодиёти ривожига молия муассасаларининг ўрни долзарблигини ҳамда мазкур мини-банк мисолида банк томонидан шакллантирилгадиган хизмат кўрсатиш марказлари аҳоли ва тадбиркорлик субъектларининг банк хизматларига бўлган эҳтиёжларини қулай, тез ва замонавий технологиялар асосида қондиришини алоҳида таъкидлаб ўтди.

Бу каби мини-банклари очиш орқали банк хизматларини бевосита истеъмолчилар учун қулай бўлган ҳудудларга етказиб бериш – банк раҳбариятининг келгусидаги бош мақсадларидан биридир.

Маълумки, акциядорлик тижорат Халқ банкнинг “Янги йил совғаси” тиражи, пул-буюм ютуқли лотереяси (3-чиқарилиши) ютуқлар тиражи 2018 йил 27 декабрь куни Жиззах шаҳрида “Жиззах вилоят мусиқали драма театри” биносида очик тарзда ўтказилиб, унда республикамизда ишлаб чиқарилган 8 та “Спарк” автомобили, 10 млн., 3 млн. сўмлик ҳамда бошқа кўплаб бошқа пул ютуқлари ўз эгаларини топган эди.

“СПАРК” ЮТУҚ ЭГАЛАРИГА ТОПШИРИЛДИ

Яқинда ушбу лотерея голибларини тақдирлаш маросими бўлиб ўтди. “Спарк” автомобили эгасига айланган уч нафар омадли юрдошимиз, яъни Тошкент вилояти Зангиота туманида истиқомат қилувчи Бобурхўжа Рихсибеков, Сурхондарё вилояти Термиз шаҳридан Алишер Пардаев ҳамда Андижон вилояти Андижон туманида яшовчи Абдулла Аҳмадалиев машина қалитларини олар экан, бу ютуқлардан беҳад хурсандлигини билдириб ўтдилар.

– Халқ банки лотереяларидан тез-тез омадимни си-наб тураман, – дейди Абдулла Аҳмадалиев. – Бироқ шу пайтгача бирор буюм юганим йўқ эди. Бунга қарангки, Янги йил арафасида “Спарк” автомобили насиб этди. Ҳеч кутмаган эдик. Бу оиламиз учун чинакамига “Янги йил совғаси” бўлди.

Халқ банки томонидан ташкил этилган ушбу тираж-ли, пул-буюм ютуқли лотереяда 2 та разрядда, икки миллион донада, жами 4,0 млрд. сўмлик билет муо-малага чиқарилган бўлиб, жами ўйналган ютуқ фонди сум-маси бир миллиард 979 миллион 556 минг сўмни таш-кил этади.



Бундан ташқари, ушбу тираж доирасида Халқ банки томонидан Жиззах вилояти Халқ таълими бошқармасига қарашли 32-сонли ёрдамчи интернат мактабига “Дамас” автомобили хайрия сифатида берилди. Шунингдек, ушбу мактаб-интернатнинг моддий-техника базасини яхшилаш мақсадида 40 млн. 800 минг сўм хайрия қилинди.

Шу билан бирга, Жиззах шаҳридаги 5-сон ихтисос-лашган мактабгача таълим муассасасига 51 млн. 100 минг сўм ҳамда Жиззах шаҳар ҳокимлигига қарашли “Жиззах фаровонлиги” хайрия жамғармасига ногиронлик аравачаларини харид қилиш учун 20 млн. сўм миқдорида ижтимоий хайрия маблағлари ажратилди.

“ИНВЕСТИЦИЯ” ВА 0 %ЛИ ОНЛАЙН-КОНВЕРСИЯ

“Ўзмиллийбанк” миллий валютадаги янги “Инвестиция” номли омонатини таклиф этмоқда.



Омонат муддати 13 ёки 18 ой бўлиб, йиллик фоиз ставкаси мутаносиб равишда 20 ва 21%ни ташкил этади. Унинг бошлангич бадал миқдори 1 млн. сўм бўлиб, фоизлар ҳар ойда тўлаб берилади. Қўшимча бадаллар нақд ва нақдсиз кўринишда қабул қилинади.

Омонат муддатидан олдин бекор қилинган ҳолда, у келишилган шартлар асосида тўлаб берилади.

Мазкур омонатни банкнинг “Milliy” мобил иловаси орқали бир неча клик ёрдамида очиш имконияти ҳам мавжуд.

Омонатни масофадан туриб расмийлаштириш мобил банкнинг хизматларини кўрсатиш шартномаси – оммавий оферта шартларига асосан амалга оширилади.

Шунингдек, эндиликда “Ўзмиллийбанк”нинг “Milliy” мобил иловасида хорижий валютани онлайн тарзда сотиб олишда бошқа банкларнинг UzCard карталаридан “Ўзмиллийбанк” VISA картларига конверсия қилиш комиссиясиз амалга оширилади.

“ИПАК ЙЎЛИ” БАНКИДАН ҚАТОР ҚУЛАЙЛИКЛАР

Мижозларга кўрсатилаётган хизматлар сифатини янада яхшилаш ва уларни осонлаштириш мақсадида “Ипак йўли” банки исталган халқаро Visa ва UnionPay карталарига валюта сотиб олиш имкониятини ҳадя этди. Илгари бу имконият фақат конверсион карталарда мавжуд эди.

Банк томонидан чиқарилган карталардан нақд пул ечиш эса энди бепул бўлди. Илгари 0,5 % хизмат ҳақи олинарди. Шунингдек, банкнинг янги мобил иловаси орқали банкка бормасдан туриб ҳам валюта сотиб олиш имконияти мавжуд.

“КАРТАЛАР 24”ДАН АЖОЙИБ ЯНГИЛИК

“Капиталбанк” ўзининг мобил иловаси – “Kapital 24” орқали банк карталари орасидаги конверсияларни бепул, ҳеч қандай комиссия тўловларисиз амалга оширишни йўлга қўйди. Эндиликда банк мижозлари исталганча пулни конвертация қилиш имкониятига эгалар.

Бошқа банклар картасидан конверсия қилинганда эса 0,1% комиссия ҳақи олинади, холос.

Шунингдек, банк мобил иловаси орқали исталган банкнинг сўм картасидан бепул комиссия тўловсиз онлайн-омонат очиш ва тўлдирish имконияти ҳам мавжуд.

Фақат дастур бўйича ҳисобланган фоизларни олиш учун АТБ “Капиталбанк” картасини очиш лозим бўлади.



Янги меъёрий-ҳуқуқий ҳужжатларни тақдим этамиз

КОН-МЕТАЛЛУРГИЯ ТАРМОҒИ КОРХОНАЛАРИ ФАОЛИЯТИ ТАКОМИЛЛАШТИРИЛАДИ



Кон-металлургия тармоғи корхоналари фаолиятини янада такомиллаштириш чора-тадбирлари тўғрисида Президент қарори қабул қилинди.

Қарорга мувофиқ, кон-металлургия тармоғининг йирик корхоналари 2019 йил якунидан бошлаб:

- молиявий ҳисоботларни мажбурий тартибда молиявий ҳисоботларнинг халқаро стандартлари асосида тузади ва халқаро аудиторлик компанияларини жалб этган ҳолда мустақил ташқи аудитни ўтказиши;
- активларни сотиш рентабеллиги, актив ва мажбуриятларнинг айланиши, шунингдек, халқаро фонд биржалари ва молия институти тарафларига асосан белгиланадиган бошқа кўрсаткичлар даражаси бўйича минимал талабларни амалга ўтга жорий қилади.

- 2020 йил якунидан бошлаб:
 - ҳисоб ва ҳисобот бўйича халқаро стандартлар (ISAR) принциплари ва талаблари асосида корпоратив ошқоралик татбиқ этилади;
 - глобал ташаббускорлик ҳисоботи (GRI) мувофиқ ҳисоботлар, шу жумладан, иқтисодий, ижтимоий ва экологик масалалар бўйича чоп этилади.

Уран қазиб чиқариш ва қайта ишлаш бўйича давлат корхонасини ҳамда қимматбаҳо металллар қазиб чиқариш ва қайта ишлаш бўйича акциядорлик жамияти шаклидаги корхонани ташкил этиш орқали “Навоий КМК” ДК қайта ташкил этилади.

2019 йил 1 мартга қадар халқаро маслаҳатчи ва экспертларни жалб қилган ҳолда “Навоий КМК” ДКнинг балансида бўлган ва захиралари Қидирув натижалари, минерал ресурслар ва руда захиралари ҳисоботи Австралия кодекси (JORC Code) стандартларига мувофиқ қайта баҳоланадиган конлар рўйхати тасдиқланади.

2019 йил 30 августга қадар халқаро экспертлар иштирокида “Давлат мулкни бошқариш тўғрисида”ги қонун лойиҳаси ишлаб чиқилади.

ХАЛҚАРО ОБЛИГАЦИЯЛАРНИ ЧИҚАРИШ ВА ЖОЙЛАШТИРИШ БҒИИЧА ҲУКУМАТ ҚАРОРИ ҚАБУЛ ҚИЛИНДИ




Ўзбекистон Республикасининг халқаро облигацияларини чиқариш ва жойлаштириш бўйича чора-тадбирлар тўғрисидаги Ҳукумат қарори қабул қилинди.

- Қарорга мувофиқ, Молия вазирлиги куйидаги операцияларни амалга ошириши белгиланди:
- халқаро молия бозорига Ўзбекистон номидан халқаро облигациялар эмитенти бўлиб иштирок этиш;
 - халқаро облигацияларни чиқариш ва жойлаштириш бўйича шартнома ва битимлар тузиш;
 - халқаро облигациялар бўйича тўловларни амалга ошириш;
 - тегишли банк ҳисобварақларини очиш ва юритиш.
- Қарор билан молия вазирлиги халқаро облигацияларни чиқариш ва жойлаштириш бўйича шартнома ва битимларни имзолаш ваколати берилди. Мазкур битим ва шартномалар бўйича Адлия вазирлиги томонидан юридик хулоса берилиши лозим.

ЁГ-МОЙ САНОАТИ РИВОЖЛАНТИРИЛАДИ

“Ёг-мой тармоғини янада ривожлантириш бўйича кўшимча чора-тадбирлар ва соҳани бошқаришда бозор механизми янги жорий этиш тўғрисида”ги Президент қарори қабул қилинди.



Қарор билан Ёг-мой саноати корхоналари уюшмаси ташкил этилди. “Ўзгёймоисаноат” уюшмасининг асосий вазифаси ёг-мой хомашёларини қайта ишлаш ва ёг-мой саноатини ривожлантириш стратегиясини ишлаб чиқиш ҳисобланади.

2022 йил 1 январгача Уюшма мол-мулк солиғи ва фойда солиғидан озод этилди.

“Ўзгёймоисаноат” уюшмаси таркибига қирадиган ташкилотлар 2021 йил 1 январгача:

- ўсимлик ёғи ишлаб чиқариш мақсадида импорт қилинадиган соя дуккағи, кунгабоқар ва бошқа мойли ўсимликлар уруғлари бўйича божхона тўловларидан;
- кўшимча қиймат солиғидан озод қилинди.

Ёг-мой саноати корхоналарига 2022 йил 1 январгача республикада ишлаб чиқарилмайдиган каустика сода, активлаштирилган табиий минерал маҳсулотлар ва катализаторлар импортда қўшилган қиймат солиғини тўлашни 90 кунга кечиктириш имконияти берилди.

Қарор билан Ҳукуматга қуйидаги вазифалар юкланди:

- Ёг-мой саноатида амалдаги ишлаб чиқаришларни техник ва технологик жиҳатдан янгилаш ва янгиларини ташкил этиш бўйича инвестиция лойиҳаларини амалга ошириш юзасидан “Йўл харитаси”ни тасдиқлаш;
 - 2019–2020 йилларда 150 миллион АҚШ доллари миқдоридидаги 37 та инвестиция лойиҳасини амалга ошириш;
 - мавжуд ишлаб чиқариш қувватларидан фойдаланишни 90 фоизгача етказиш;
 - 2021 йилгача ёг-мой хомашёлари жамғариш миқдорини 100 минг тоннагача етказиш;
 - 2021 йилгача ўсимлик ёғи ишлаб чиқариш ҳажмларини 400 минг тоннагача етказиш.
- Шунингдек, ёг-мой саноати тармоғи кадрларини қайта тайёрлаш ва малакасини ошириш бўйича илмий-амалий марказ ташкил этилади.

“АНДИЖОН-ФАРМ” ЭРКИН ИҚТИСОДИЙ ЗОНАСИНИ ТАШКИЛ ЭТИШ Тўғрисидаги Президент Фармони қабул қилинди.

Фармон билан Андижон туманида “Андижон-фарм” эркин иқтисодий зонаси ташкил этилди.

“Андижон-фарм” ЭИЗнинг асосий вазифаси фармацевтика маҳсулотлари ва дори воситаларини ишлаб чиқарувчи корхоналарни ташкил этиш учун Ҳиндистон компанияларининг тўғридан-тўғри инвестициялари ва илғор технологияларини жалб этиш ҳисобланади.

“Андижон-фарм” ЭИЗнинг фаолият мuddати 30 йил бўлиб ушбу мuddат давомида унинг ҳудудида алоҳида солиқ ва божхона тартиблари амал қилади.

Ушбу зона иштирокчилари куйидагилардан озод этилади:

“АНДИЖОН-ФАРМ” ЭРКИН ИҚТИСОДИЙ ЗОНАСИ ФАОЛИЯТИ БОШЛАДИ

- ер солиғи, даромад солиғи, юридик шахслар мулк солиғи, микрофирмалар ва кичик корхоналар учун ягона солиқ тўловларидан;
- четдан келтириладиган қурилиш материаллари божхона тўловларидан;
- четдан келтириладиган асбоб-ускуналар, хом ашё, материаллар ва бутловчи буюмлар учун божхона тўловларидан.

2019 йилда “Андижон-фарм” ЭИЗ тўғрисида Ҳиндистон Республикаси ва хорижий мамлакатларда тақдирот ўтказилди.

“Давлат активларини бошқариш, монополияга қарши курашишни тартибга солиш тизимини ва капитал бозорини тубдан такомиллаштириш чора-тадбирлари тўғрисида”ги Президент Фармони қабул қилинди.

Фармон билан куйидагилар ташкил этилди:

- Давлат активларини бошқариш агентлиги;
 - Монополияга қарши курашиш қўмитаси;
 - Капитал бозорини ривожлантириш агентлиги;
 - Давлат активларини бошқариш, трансформация ва хусусийлаштириш жамғармаси.
- Тадбиркорлик фаолияти асосларини ўқитиш республика маркази Савдо-саноат палатасига берилди.

Тугатилмаётган Давлат рақобат қўмитасининг қуйидаги функциялари:

- бўш турган объектларнинг ишлаб чиқариш фаолияти самардорлигини ошириш функцияси – Давлат солиқ қўмитаси ва Ер ресурслари, геодезия, карто-

Янги давлат бошқаруви органлари ташкил этилди



графия ва давлат кадастри давлат қўмитасига;

• бўш турган объектларнинг ишлаб чиқариш фаолиятини тиклашга қаратилган инвестиция лойиҳаларини ишлаб чиқиш бўйича идоралараро комиссияларнинг ишчи органи сифатидаги функцияси – Инвестициялар бўйича давлат қўмитасига ўтказилди.

Фармонга мувофиқ, давлат улушларини бошқарув-бошқарув қисқартириш, самарали ва шаффоф хусусийлаштиришни таъминлаш давлат сиёсатининг асосий йўналиши этиб белгиланди.

Давлат активларини самарали бошқариш бўйича ягона давлат сиёсатини юритиш – Давлат активларини бошқариш агентлигининг;

- товар ва молия бозорларида рақобат муҳитини таъминлаш соҳасида ягона давлат сиёсатини амалга ошириш – Монополияга қарши курашиш қўмитасининг;
- қimmatли қоғозлар бозорини шакллантириш, ривожлантириш, тартибга солиш ва корпоратив бошқарув соҳасида ягона давлат сиёсатини амалга ошириш – Капитал бозорини ривожлантириш агентлигининг асосий вазифалари ҳисобланади.

СТАТИСТИКА

ЎЗБЕКИСТОН РЕСПУБЛИКАСИНИНГ САНОАТ ИШЛАБ ЧИҚАРИШИ
2018 ЙИЛНИНГ ЯНВАРЬ-ДЕКАБРЬ ОЙЛАРИ

Дастлабки маълумотлар буйича, 2018 йилнинг январь-декабрь ойларида республика корхоналари томонидан 228,9 трлн. сўмлик саноат маҳсулотлари ишлаб чиқарилган бўлиб, ўтган йилнинг тегишли даврига нисбатан ўсиш суръати 114,4%ни ташкил этди.

Жами саноат ишлаб чиқариш ҳажми ўсишининг асосий омили ишлаб чиқарадиган (қайта ишлаш) саноатида ишлаб чиқариш ҳажмининг 13,2%га, тоғ-кон саноати ва очиқ конларни ишлашнинг – 25,4%га, электр, газ, буғ билан таъминлаш ва ҳавони кондициялашнинг 4,1%га ва сув билан таъминлаш, канализация тизими, чиқиндиларни утилизация қилишнинг – 22,6% га ўсиши ҳисобланади.

2018 йилнинг январь-декабрь ойларида асосий иқтисодий фаолият турлари буйича саноат ишлаб чиқариш таркиби





Тоғ-кон саноати ва очиқ конларни ишлаш.

Тоғ-кон саноати ва очиқ конларни ишлаш корхоналари томонидан 2018 йилнинг январь-декабрь ойларида ишлаб чиқарилган маҳсулотлар ҳажми 36,9 трлн. сўмни ёки жами ишлаб чиқарилган саноат маҳсулотлари ҳажмининг 16,1%ни ташкил этди.

Тоғ-кон саноатида ишлаб чиқарилган маҳсулотлар тури буйича чақиқ тош қазиб олиш ҳажми ўтган йилнинг тегишли даврига нисбатан 1,2 мартага, кўмир – 3,4%га, газ конденсати – 9,9%га ва табиий газ – 6,1%га осган. Шу билан бирга нефть қазиб олиш ҳажмининг 8,2%га, шағал эса – 12,3%га камайганлигини кузатиш мумкин.

Тоғ-кон саноати ва очиқ конларни ишлашда йирик саноат корхоналари томонидан айрим турдаги саноат маҳсулотларини ишлаб чиқариш


	2018 й. январь-декабрь	ўсиш суръати, %
кўмир, минг тонна	4174,4	103,4
нефть, минг тонна	746,4	91,8
табиий газ, млн.куб.м	59842,2	106,1
Газ конденсати, минг тонна	2143,6	109,9
чақиқ тош, минг тонна	1191,1	119,8
шағал, минг тонна	401,4	87,7



Ишлаб чиқарадиган саноат (қайта ишлаш саноати)
2018 йилнинг январь-декабрь ойларида саноат корхоналари томонидан ишлаб чиқарилган маҳсулотлар ҳажми 175,4 трлн. сўмни ва ўтган йилнинг шу даврига нисбатан 113,2% ўсиш суръатини ташкил этди.

Ишлаб чиқарадиган саноат таркибида юқори технологияли тармоқнинг улуши 1,6%ни (2017 йил январь-декабрь ойларида – 1,9%), ўрта-юқори технологияли – 29,7% (21,7%), ўрта-қуйи технологияли – 29,8% (27,0%) ва қуйи технологияли – 38,9% (49,4%) ташкил этди.

Ишлаб чиқаришнинг технологик таркиби буйича ишлаб чиқарадиган саноат таркиби (январь-декабрь ойлари, 2018 й.)



Республика буйича саноат маҳсулотининг ўсишига ўрта-юқори технологияли ишлаб чиқариш сезиларли ҳисса қўшган ҳолда 9,6% кўрсаткич билан 2017 йилнинг мос даврига нисбатан ўсиш суръати 138,8%ни ташкил этди.

Ишлаб чиқарилган саноат маҳсулотлари таркибида машина ва ускуналарни ишлаб чиқариш, таъмирлаш ва ўрнатиш, автотранспорт воситалари, трейлерлар, ярим прицеплар ва бошқа тайёр буюмларни ишлаб чиқариш соҳаси 19,5% (2017 йилнинг январь-декабрь ойларига нисбатан ўсиш суръати 151,5%), ташкил этгани ҳолда тўқимачилик, кийим, тери маҳсулотларини ишлаб чиқариш 13,7% (110,0%), озиқ-овқат, ичимликлар ва тамаки маҳсулотларини ишлаб чиқариш 13,2% (96,3%) ни, металлургия саноати 11,2% (105,7% фоиш) ва кимё маҳсулотлари, резина ва пластмасса буюмларини ишлаб чиқариш 8,3% (102,1%)ни ташкил этди.

Технологик жиҳозларни капитал таъмирлаш ишлари кимё корхоналари ишлаб чиқариш қувватларидан фойдаланиш ҳажмини ошириш имконини бериб, калий хлорид (2017 йил январь-декабрга нисбатан 108,6%), аммоний нитрат (111,1%), бошқа азотли ўғитлар ва уларнинг аралашмалари (114,2%), формалдегид (1,2 мартага), акрил асосли бўёқ ва локлар (134,5%), суперфосфатлар (1,8 м.), азот, фосфор ва калийли минерал ўғитлар (2,1 мартага) ўтган йилнинг шу даврига нисбатан ишлаб чиқариш кўрсаткичлари ошиши таъминланди.

Қишлоқ ҳўжалигига етказиб берилаётган қишлоқ ҳўжалиги техникалари ишлаб чиқаришни маҳаллийлаштириш буйича амалга оширилаётган комплекс чора-тадбирлар ҳам республика буйича ўрта ва юқори технологияли ишлаб чиқариш маҳсулотларининг ошишига имкон берди. 2017 йил январь-декабрга нисбатан йирик корхоналар томонидан ишлаб чиқариш ҳажмлари: плуглар 64,5 мартага, тракторлар 3,4 мартага, галла ўриш комбайнлари 19,4%га оширилди.

Истеъмол товарлари ишлаб чиқариш.


Тайёр маҳсулотлар турларини кенгайтириш ва ишлаб чиқарилишини қўллаб-қувватлаш буйича амалга ошириб келинаётган чора-тадбирлар натижасида истеъмол товарлар ишлаб чиқариш ҳажми 84,3 трлн.сўмни ташкил этди ва 2017 йилнинг январь-декабрь ойларига нисбатан 15,9%га ўсиши таъминланди, жами саноатдаги улуши эса 36,8%ни ташкил этди. 2017 йилнинг январь-декабрь ойларига нисбатан истеъмол товарлари таркибида ноозиқ-овқат товарлари ишлаб чиқариш улушининг 58,2% дан 2018 йилнинг январь-декабрь ойларида 68,8%га ошиши кузатилмоқда.

Озиқ-овқат маҳсулотлари ишлаб чиқариш таркибида шароб ва ароқ маҳсулотлари ва пиво 7,7%ни (2017 йил январь-декабрь ойларида 6,6%) ташкил этди.

БАНК ДЕПОЗИТЛАРИ ВА КРЕДИТЛАРИ БЎЙИЧА ФОИЗ СТАВКАЛАРИ




2018 йил декабрь ойда 1 йилгача бўлган миллий валютадаги мuddатли депозитлар буйича ўртача тортилган фоиш ставкаси 14,0%ни ташкил этиб, 2017 йилнинг декабрь ойига нисбатан 2,2%га пасайди. Шу билан бирга, 2018 йил декабрь ойда 1 йилдан юқори бўлган миллий валютадаги мuddатли депозитлар буйича фоиш ставкаси 2017 йилнинг мос даврига нисбатан 3,1%га ошиб, 16,1%ни ташкил этди.



2018 йил декабрь ойда 1 йилгача бўлган чет эл валютасидаги мuddатли депозитлар буйича ўртача тортилган фоиш ставкаси 2017 йил декабрь ойи даражасидан (3,8%) деярли осмаган ҳолда 3,9%ни ташкил этди. 2018 йил декабрь ойда 1 йилдан юқори бўлган чет эл валютасидаги мuddатли депозитлар буйича ўртача тортилган фоиш ставкаси 4,6%ни ташкил этиб, 2017 йил декабрь ойига нисбатан 1,6%га ўсди.



2018 йил декабрь ойда миллий валютадаги жами кредитлар (имтиёзли кредитлар буйича фоиш ставкаларни ҳисобга олмаган ҳолда) буйича ўртача тортилган фоиш ставкаси 2017 йилнинг декабрь ойига нисбатан 3,3%га ошиб, 21,8%ни ташкил этди. Шунингдек, қисқа мuddатли кредитлар буйича ўртача тортилган фоиш ставкаси 2017 йил декабрь ойидаги 17,6%дан 2018 йил декабрь ойига келиб 22,4%гача ҳамда узоқ мuddатли кредитлар буйича 18,7%дан 21,5%гача ошиши кузатилди.



2018 йил декабрь ойда чет эл валютасидаги бarchа кредитлар буйича ўртача тортилган фоиш ставкаси 2017 йилнинг декабрь ойига нисбатан 0,5%га ортиб, 6,1%ни ташкил этди. Шу билан бирга, 2018 йил декабрь ойда қисқа мuddатли кредитлар буйича ўртача тортилган фоиш ставкаси 2017 йил декабрь ойи даражасида сақланиб қолиб, 7,8%ни ташкил этди. Узоқ мuddатли кредитлар буйича фоиш ставкаси эса 5,3%дан 5,9%гача ошиши кузатилди.

БУ ҚИЗИҚ

НОДАТИЙ КЎРИНИШДАГИ БАНКЛАР

Нима деб ўйлайсиз, банкни кичик бир торт бўлаги, космик кема ёнгики бирор банкнотада жойлаштириш мумкинми? Йўқ дейишга асло шошилманг. Сабаби ҳозирги замон архитектураси бор экан, инсоннинг ҳаёлот олами ожизлик қилган ғайритабиий кўринишни ҳақиқатга айлантириш у қадар қийин эмас.

Куйида замонавий архитектура-си ва ўзига хос қиёфаси билан кўпчиликини хангу манг этган ғайритабиий кўринишдаги банклар билан яқиндан таништирамиз.

“SUGAMO SHINKIN”



Суратда акс этган бино Япония-даги “Sugamo Shinkin” банкидир. Қаватли пирог шаклини эслатувчи ушбу бино “Emmanuelle Moureaux architecture + Design” архитектура студияси ғояси асосида қурилган. У ташқи кўринишдан кўп қаватли бинога ўхшаса-да, бор-йўғи 3 қаватдан иборат.

“Қаватли пирог” шакли банк биноти-га ўзига хос замонавийлик ва чирой бахш этган, айниқса, тунги чироқлар остида у янада ўзгача қиёфада акс этади.

“OFFICE CENTER 1000”



Литванинг Каунас шаҳридаги “Office Center 1000” номли бино эса банкно-та шаклида қурилган. Қизиғи шунда-ки, “RA Studija” архитектура бюроси ушбу иншоотни бирорта банкнинг мах-сус буюртмаси асосида бунёд этма-ган. Бироқ, шунга қарамай, бинода бир неча офислардан ташқари мамлакат-нинг икки йирик банки ҳам жойлашган. Ўзига хос жиҳатлардан яна бири, ушбу офисда одатий кўринишдаги бирорта ҳам деразани учратмайсиз. Бинонинг ташқи кўриниши шиша ва турли хил элементлардан ташкил топган, холос.



“ОСИЁ БАНКИ”

Бангкокдаги ушбу “банк-робот” 1986 йилда пайдо бўлган. Таиландлик диза-йнер Самет Жамсай ўтган асрнинг 70-80 йилларида компьютерлаштириш ва роботлаштириш мавзусига бағишлаб, мазкур бинони лойиҳалаштиришга ки-ришади. Меъмور эътиборни тортув-чи бундай меъморий образ орқали сайёрамиз аҳолисининг онги-шуурини тасвирламқчи бўлган.

QQBANK



“NMDA” архитектура студияси То-киода мижоз билан биринчи алоқани амалга оширишга мўлжалланган шун-дай рамзий кўринишга эга банк офи-сини қуради. Бинонинг фасаддаги расми молия оқимини ифодалайди.

DNB




Йирик Норвегия молия гуруҳининг янги офиси турли бинолардаги ходим-ларни бир “уй”га жамлаши керак эди. Голландиянинг “MVRDV” архитекту-ра бюроси бу ишнинг уددасидан чиқди – кубиклардан 17 қаватли бино қурди. Унинг ҳар бир қавати бошқаларидан ажралиб туради, шу сабабли ҳам би-нодан фойдаланиш жуда қулай.

Саҳифани Г. МАЛИКОВА тайёрлади.

“БУНИ ҚАНДАЙ ҚИЛИШИМ МУМКИН?”

Бизнес бўйича файласуфликни қўлга киритган дунёга машҳур беш ин-сондан бири Роберт Киосаки ўзининг “Бой бола, ақлли бола” китобида ўқувчиға бой ва бахтли бўлишнинг, молиявий эркин инсонга айлангуннинг зарур йўллари ҳаётий тажрибалар, маслаҳатлар ва шахсий билимлар орқали кўрсатиб берган. Унинг ўзбек тилидаги кўриниши Мирафзал Мир-файзиев таржимасида “Насаф” нашриёти томонидан нашр қилинган.

Куйида мазкур китобдан ўрин олган руҳан кучли ва бой бўлиш йўлида эътиборга олиш лозим бўлган инсон психологияси хусуси-да сўз юритилади.



Катталар билан ишлаш тажри-бам шуни кўрсатдики, бойни бойроқ бўлишга, ақллини янада ақллироқ бўлишга ўргатиш осон. Куйидагича гапирадиган инсонларни бой бўлишга ўргатиш жуда ҳам қийин:

- Агар пулимни йўқотсам-чи?
— Лекин ишончли, доимий ишга эга бўлиш керак-ку!
— Текинга ишлаб бўладими, одам-ларга ҳақ тўлаш керак!

- Қарзга ботманлар;
— Жон-жаҳдинг билан ишла, пул йиғ;

- Таваккал қилма, ишингни билиб қил;
— Ҳамма бойлар — очкўзлар;
— Овқат устида пул ҳақида гапир-маймиз;

- Пул мени қизиқтирмайди;
— Мен бундай қила олмайман;
— Бу шундай қимматки...

Бундай савол ва мулоҳазалар ин-соннинг ўзига бўлган ишончи йўқлиги чўқурлашиб кетгани сабабли келиб чиқади...

“Мен буни қила олмайман!” Ҳеч қачон бундай деманг. Менинг бой отам ақлли бўлгани учун пул факат гоа эканини тушунарди. У менга ва ўғлига “Мен буни қила олмайман!” де-

йишни тақиқларди, шу билан ўзимиз ҳақидаги фикрни ўзгартиришга инти-ларди. Шунинг учун у бизга “Қандай қилиб буни қилишим мумкин?” дейи-шни ўргатарди.

Доимо “Мен бундай қила олмай-ман!” деб ўзимнинг камбағал сифа-тида таассуротимни кучайтириб бо-раман. Лекин “Буни қандай қилишим мумкин?” деб ўзимнинг бой одам си-фатида таассуротимни кучайтира-ман.

... Юқоридаги икки гапни таҳлил қилсангиз, “Қандай қилиб бу-ни қилишим мумкин?” деганингиз-да ақлинингизнинг имкониятларни қидиришга йўналтирилаётганини сез-асиз. Бошқа томондан, “Мен бу-ни қила олмайман!” дейишингиз си-зни ҳар қандай ҳаракатдан тўхтатади. Шундай қилиб, мен ўзимни “Буни қандай қилишим мумкин?” дейишга мажбур этиб, бир вақтлар камбағал болани кучли ва бой қилдим.

БИЛАСИЗМИ?

ЎЗБЕК СЎМИ

Ўзбекистоннинг амалдаги мил-лий валютаси сўм — Ўзбекистон Республикаси Олий кенгашининг 1993 йил 3 сентябрдаги №952-XII қарорига мувофиқ, Ўзбекистон Республикаси Президентининг 1994 йил 16 июндаги ПФ-870 сонли фар-мониға биноан, 1994 йилнинг 1 ию-лида, ўзгача амалда бўлган сўм-купонга 1:1000 нисбатда муомалаға киритилган.



Тарихға назар солсак, сўм энг қадимги атамалардан бири бўлиб, Фирдавсийнинг “Шоҳнома” асарида “сўм” пул солинган қопча (халта) маъ-носида қўлланилган. XIV асрда сўм Олтин Ўрда хонлиғида оғирлик бир-лиги бўлиб, муайян оғирликдаги ку-муш куйма (ёмби)ни ифодалаган.

Сўм дастлаб 1, 3, 5, 10, 20, 50 тийинлик тангалар ҳамда, 1, 3, 5, 10, 25, 50, 100 сўмлик қоғоз купюралар киритилган.

1994 йилда муомалаға киритил-ган 100 сўмгача бўлган жамики қоғоз пуллар Германиянинг “Giesecke & Devrient” фирмасида чоп этилган. (Ҳозир бу ерда ЕИ валютаси — евро ҳам чоп этилади). 1997 йили муома-лага киритилган 200 сўмликдан бош-лаб, кейинги барча купюралар Тош-кентдаги “Давлат белгиси” ДИЧБда босилмоқда.

БАНК АХБОРОТНОМАСИ
АХБОРОТ-ТАҲЛИЛИЙ ГАЗЕТА
ҲАМКОРЛАРИМИЗ ВА МУАССИС
Ўзбекистон Республикаси Марказий Банки
“Norma Hamkor” МЧЖ
“Moliya yangiliklari agentligi” МЧЖ
БОШ МУҲАРРИР P.O. ОХУНОВ
Нашр учун масъул Б. МУҲАММАДИЕВ
ХОЛ ЭТИШГА ТАЙЕРЛОВЧИ
“Moliya yangiliklari agentligi” МЧЖ
Газета тахририятнинг техник ускуналарида саҳифаланди.
АХБОРОТ КЎМАГИ
Ўза, “Туркистон-пресс” НАА
ТАХРИРИЯТ МАНЗИЛИ: 100060, Тошкент ш., Шахрисабз кўчаси, 23-уй. e-mail: info@banknews.uz, www.banknews.uz
Реклама ва эълонлар учун 71 232-45-32 телефони орқали муурожаат қилинг. Факс: 71 232-43-98.
Нашр индекси — 102.
Тахририятнинг фақат ёзма розилиғи билан “Банк ахборотномаси” да эълон қилинган материалларни кўчириб босишга ихозат берилади. Қўлэзмалар тақриз қилинмайди ва қайтарилмайди.
Газета Ўзбекистон Матбуот ва ахборот агентлиғи томонидан 2012 йил 10 январьда 0065-тартиб рақами билан рўйхатга олинган.
Газета ҳафтада бир марта пайшанба куни чиқади.
Буюртма № г 103. Адади 2458 нусха.
Нархи шартнома асосида.
Газета А3 ҳақмда, 2 шартли босма табақда чоп этилди.
Босишға рухсат этилди: 23.01.2019 й., 9.00.
1 2 3 4 5